

## Relazion dl ann 2022

di assessorac: jëuni, sport, cantier de chemun y palé nëif

### JËUNI – SPORT

#### Instà vif:

Tl ann 2022 iel unì urganisà, deberieda cun l'assessëura per la families Martina Comploi, per l'segondo iede l "Instà vif". Chësc iede à fat pea bën sies lies, doves deplù che tl ann dant. Al FC Gherdëina, Schiclub, Tennisclub Urtijëi y La Vëta se à juntà nce l HC Gherdëina y l Eis Club Gardena. N à ulù ti dé inant chësta puscibltà sëuraprò ala mutans y ai mutons dla scola elementera y mesana per fé sport y vester creatifs ntan l instà. L proiet ie jit dai 20 de juni nchin ai 26 de agost y à pità ndut nuef enes de sport y creatività.

#### MUDA:

D'ansciuda 2022 ie finà via l prim ann dl proiet Muda che ie unì metù a jì te na grupa de lëur deberieda cun doi cumëmbres dla lia VKE de Urtijëi, Martina Leitner y Monica Pescosta, la nsenianta de ginastica Monica Runggaldier y l'assessëura ala families Martina Comploi. N proiet che dà la puscibltà de purvé ora 6 sporc desfrënc per un n iede al'ena. Uni sport vën fat 5 iedesc. Nsci se à la mutans y i mutons ancuntà de ndut 30 iedesc ntan l ann de scola. Ntan l instà 2022 an abinà na coordinadëura che, tres la lia VKE, urganisea y mët a jì chësc proiet per i ani che vën. Per l ann de scola 2022/2023 à Marlene Pitschieler tët su chësta ncëria y n spera che la possa fé inant nce tl daunì.

#### Sport und Schule:

N se à ancuntà cun la lies y cun reprejentanc dla scola per mëter a jì l proiet "Sport und Schule". Na scumenciadiva per fé a na maniera che i mutons posse sté deplù dedora se dedican al muviment y al sport ntan l'ëures de scola.

#### Coding for Kids:

Per l prim iede iel d'instà 2022 unì metù a jì dal team Coding for Kids a Urtijëi tla sala di cungrësc trëi enes de curs de programé sun computer. De ndut à fat pea 25 mutans y mutons de Urtijëi y di luesc ntëurvia. Chësc ie n proiet che vën fat te duta la provinzia cun ades 400 partezipanc.

#### Nëus Jëuni Gherdëina:

On sustenì la Nëus Jëuni Gherdëina te si ativiteies plu mpurtantes. Deberieda cun la Nëus Jëuni y nce cun la grupes di jëuni dla valeda se an sentà adum plu iedesc per cialé co y cie ti pité ala jëunes y i jëuni per ti fé sentì miec y plu trac ite tla vita dl luech. Chësc a purtà a nueva ideies sciche p.ej. l "Aperitivo lungo" che vën sën metù a jì plu iedesc ntan l ann ti local di jëuni di trëi chemuns dla valeda. Sëuraprò ti iel unì dat n ufize nuef ala Nëus Jëuni Gherdëina, sëura la bibliotech, nsci che i ebe plu lerch tl local di jëuni per se dé ju cun ëi. Per l local di jëuni "Saut" iel unì dat n finanziamënt da pert dl chemun per sfië ju l fonz de lën.

Leprò iel unì purtà la ghiranzas di jèuni tl gremium dla Consulta Provinziela di Jèuni, mantenian nsci l cuntat cun l i raprezentanc provinziei de competènza. Tlo iel dantaldut unì metù a jì sèires de nfurmazion per i jèuni y n di de tlausura deberieda a duta la trèi consultes dla provinzia ulache l ie unì tratà i problems di jèuni aldidancuei. Chësc ie pona nce unì purtà dant y mandà ai assessëures cumpetënc dla provinzia.

#### **Festa di 18 ani:**

Ai 5 de nuëmber 2022 iel unì metù a jì la festa di 18 ani cun la jèunes y i jèuni dl ann 2004. I jèuni de Urtijèi se à ancuntà domesdi via te Chemun de Urtijèi, ulache l ie unì mustrà la Cësa de Chemun y dut i ufizies dl Chemun spiegan coche l funzonea y cie che ie n cunsèi, na jonta y nsci inant. Daldò se an pona ancuntà cun duc i jèuni dla valeda tl local di jèuni de S.Cristina "L Puliné". Iló fova nce l "Jugend Coaching" Giovani y l aucat Ernest Cuccarollo che à spiegà truepa cosses mpurtantes coche i dèrc y i duvieres che n à do i 18 ani. Daldò iesen mo stac deberieda s'la ciaculan y s'la cuntan pra zeche da maië y da beber.

#### **Lies dal sport:**

L ie unì cialà de manteni l plu che la va l cuntat cun la lies dal sport, auzan ora la grandiscima mpurtanza che les à per duta la sozietà. Per cie che reverda i cuntribuc, sibes urdineres che straudineres, iel unì tenì cont dassënn dl'ativiteies che la lia pieta ai jèuni. L Chemun de Urtijèi à nce finanzia pea, coche udù dant dala "tle" dla valeda, la gran manifestazions sportives a nivel de valeda, danter chëstes la Copa dl Mond, la Gardena Hero, i turnoies de tennis y la garejeda de sauté "Dolomites Saslonch Half Marathon".

#### **Festa dla lies:**

Coche da tradizion iel unì metù a jì l ultim di dl ann na pitla festa te chemun cun duta la lies de Urtijèi. Ne bela ucajion per la lies y i cunselieres per se cunëscer y s'la ciaculé cun i presidënc dla lies. N à nsci cialà de ti senti gra per dut l gran lëur che i fej per l luech.

#### **Skatepark:**

N à cunlaurà inant cun la lia "Rodes Chedres" per cialé de abiné na soluzion per n skatepark tla valeda. Ntant ie vel' idea de coche n pudëssa la mplanté bele sun mëisa y n lëura sambën inant per cialé de unì a na soluzion.

#### **Meric sportifs:**

Per se cungratulé di meric sportifs arjonc on nvià te jonta l atlet Alex Oberbacher. Èl à arjont l titul de vize campion pra i campionac europeics "ISMF European Championships 2022" de jì cun la peves a Boí Taüll.

#### **Nfrastrutures**

#### **Ciamp dal palé:**

Deberieda cun l FC Gherdëina ons cialà de fé dut i lëures che fova de bujën pra l ciamp dal palé. Sëuraprò fovel da renuvé l omologazion che tumova tl 2022. Per l omologazion fovel da fé truep lëures tl ciamp y ntëurvia, coche de panchines nueves, rèies nueves, n ciancel nuef, cuncé vel lum y nsci inant. L omologazion vela per i proscimi cater ani, nchin tl 2026. Leprò, davia che la prima squadra dl FC Gherdëina ie jita su de categoria y fej sën te prima categoria,

ne possa i jugadëures, coche udù dant dal regulamënt naziunel, nia plu unì n cuntat cun chëi che cëla pro. Nsci an messù fé n troi cun na sief che va do cësa su per jì dala tribunes y sivé ite i jugadëures che va dai local per se mudé tl ciamp dal palé.

#### **Ciamp dal palé tla streda Mëisules:**

De mei dl 2022 iel unì stlut ju i lëures per fé da nuef l pitl ciamp dal palé tla plaza da fé damat tla streda Mëisules, che fova propi dassënn melciafià. L ie unì mudà ora l fonz sintetich y dut ntëur cumedà su acioche la segurëza di mutons che fej al palé sibe garantida.

#### **Palestra:**

Per l problem dla palestra a Urtijëi se àn ancuntà cun i presidënc/tes dla lies dal sport de Gherdëina, cun la/i diretëures dla scoles de Gherdëina y cun la/i nseniantes/c de ginastica de la scoles per cialé de abiné la miëura soluzion. Do avëi nce tëtut su cuntat cun l Chemun de S. Cristina iel pona unì dat su na ncëria a n architët per n stude de fatibilità per na palestra tl zënter dal sport Mulin da Coi daujin al ciamp dal palé. I prim resultac messëssen giaté ti proscimi mëns. Tl medem mumënt iesën de chëla de jì inant tla direzion de n zënter sportif da Mulin da Coi.

#### **Boulderhalle Tennis:**

Davia che l local da jì a “Bouldern” tl zënter dal Tennis a Runcadic ova de bujën de n valgun lëures de manutenzion, dantaldut per tofes y mufa che à scumencià a unì ora sota i tepih, se àn ancuntà cun la lia dl’arpizada sportiva de Gherdëina per cialé cie lëures che fossa da fé. De ndut vëniel fat lëures per zirca 10.000 euro che vën pona dat coche cuntribut ala lia.

#### **Setil:**

Nce l ann passà iel unì fat su la plaza dala dlacia via n Setil y deberieda cun l Hockey-Club Gherdëina l an giaurida al publich. Davia che l priesc dl’energia ie ntan y ala fin dl ann 2022 jit su ora de uni misura, deplù dl 100%, iel unì tëtut la dezijion de l fé mé cun dlacia naturela, zënza mascins. Ora de avëi dat dessegur n gran cuntribut al ambient y ala sustenibilità cun chësta dezijion, iesën nce stac boni de sparanië de ndut zirca 70-80 mile euro. Purempò à i zitadins pudù se nuzé dla plaza per bën plu de doi mëns. N ie tl lëur de cialé y studië co jì inant cun la plaza dala dlacia per i ani che vën.

## CANTIER DE CHEMUN

- D'autonn dl 2021 y dl 2022 iel unì njenià ca la plaza dala plaza via n Setil. Tl 2022 iel unì fat la plaza cun dlacia naturela, zènza mascins.
- Coche ti ultimi ani iel unì scrit ora na stiera per l instà che se cruzia dantaldut per la plazes da fé damat.
- D'instà iel unì sià troies, ronesc, parcs y tòc de pra de Chemun.
- L ie unì scuà y rumà su la stredes de Chemun.
- I lauranc à njenià ca y judà pra truepa manifestazions che vèn metudes a jì ntan dut l ann a Urtijëi. Suènz ai nce tüt ca y metù su l palch per la manifestazions.
- L ie unì apustà sel, giara de uni sort, asphalt, y n.i. per l cantier de chemun.
- L ie unì nciarià na firma da tlo per judé d'inviern a purté deméz la nëif cun camions.
- L ie unì cumprà guant y material, de chël che i lauranc à de bujën per lauré.
- L ie unì sotscri n cuntrat nuef cun l Eni per jì a fé penzin cun la mascins dl cantier de chemun.
- L ie unì puli da nuef duta la sief dala scolina Salieta.
- N ti ie stac do a dut cie che reverda la senialetica dl luech.

**Cuncià sieves y pitli mures:** L ie unì cuncià sieves te dut l luech, dantaldut tla streda Scurcià, dala scola elementera, tla streda Pinoi, tl troi dal luech da Cialian y tla streda Mureda.

### **Cumedà troies y sceles:**

L ie unì cumedà ca i troies y sieves de Urtijëi, dantaldut:

- I troi danter la streda Scurcià y la streda Mëisules ulache l ie unì fat nce na beliscima scela nueva;
- la scela dan l servisc soziel;
- I troi danter la scola mesana y su per l fussel de Nis, tlo iel nce unì fat la scela y na sief dut da nuef;
- I troi danter la streda Sobosch y la stazion a val dla ferata de Resciesa;
- I troi danter la streda Scurcià y la streda Pinoi.

### **Mascins y massaria:**

- L ie uni baratà ora l vedl Velos, cun n nuef Holder S100 dla firma Komland. La mascin nueva dason giaté ti proscimi mënsch.
- L ie unì cumprà na mascin a lectrisc nueva da scué l luech dala firma Glutton.
- Mëndra massaria ie unida njenieda: ciadëines, montli, peles dala nëif, gherneies y nsci inant.
- L ie unì cialà do la mascins y fat la revijions di auti.
- N majer custimënt fova cuncé la gran mascin da scué che va bel plan ti ani ma che ie unida cunceda ca drët bën y ie sën a n bon pont.

**Palé la nëif:** Ntan l inviern 2022-2023 al nevët relativamënter puech permez ai ultimi ani. De ndut al fat zirca 80 zm de nëif. I lauranc de chemun cun duta la mascins a despusizion à fat n bon lëur per tenì la stredes, troies y plazes dl luech bel nëc. Ora dla doi firmes bele nciariedes dal Chemun, à chësc inviern judà na firma da tlo cun n camion per n valgun ëura a rumé deméz

la nëif tla stredes plu strëntes. Sëuraprò à nce persones privates inò judà a palé troies y plazes per l Chemun.

Ora de chisc lëures iel mo truep d'autri pitli lëures urdineres y stroc da fé uni di che fej ala fin ora n grandiscimo lëur. Per ejèmpl:

- Cuncé pozzetti y bujes tla stredes;
- Taië lëns y sienes;
- Cumedé cubetti;
- Manteni y cuncé la mascins.

Per dut chisc lëures ti va n gran rengraziamënt ai lauranc dl cantier de Chemun y ai dependënc di ufizies dl Chemun de Urtijëi. De gra.

Cun de biei saluc,

assessëur Janpiere Prugger



